

## **Pled d'avertura da la sessiun d'avust 2025**

### **Presidenta dal Cussegl grond Silvia Hofmann**

---

*(Valair vala il pled discurre)*

Stimadas collegas e stimads collegas dal Cussegl grond

Stimada commembra e stimads commembers da la Regenza

Chara vicepresidente dal Cussegl grond

Stimà chancelier chantunal, stimada secretaria e stimads secretaris dal Cussegl grond

Preziadas collavuraturas dal secretariat en il foyer

Preziadas personas responsablas per la segirezza, preziads pedels, preziadas interpretas e preziads interprets, preziadas collavuraturas e preziads collavurats da las medias

Chars giasts sin la tribuna ed al livestream

In'ultima giada hai jau ussa l'onur d'avrir ina sessiun dal Cussegl grond, avant che mia successura en il presidi dal Cussegl grond sco er il vicepresidente dal Cussegl grond vegnan elegids e saramentads.

En quest lieu – e per gea betg emblidar quai – vuess jau l'emprim drizzar in pled a tai, chara Valérie: Jau engraziel a tai da cor per quest onn cuminaivel qua davant. Grazia fitg per tia collavuraziun, per tes sustegn e per tia colleghialità – igl è bain stà insatge spezial per nus duas. Per tia elecziun ta giavisch jau bun success e tut il bun.

Mes onn sco presidenta dal Cussegl grond è stà grondius. A Vus tuttas e tuts qua en la sala engraziel jau per Vossa bainvulientscha e per ils feedbacks amiaivels che jau hai survegnì da Vus. Jau na vi ussa dentant betg far ina retrospectiva, mabain ma deditgar – sco finiziun – ad in tema che ma stat gia dapi adina a cor: il ballape.

La fin da matg ha gì lieu a la Obere Au a Cuir il turnier da ballape U15 da la ARGE ALP. Mattas e mats dad otg pajais han giugà durant trais dis per in pocal. Tar ils mats ha il Tirol gudagnà, tar las mattas il Vorarlberg. Igl è stà ina fitg bella festa da ballape en in rom famigliar e pluriling. Ed il stabiliment da sport nov e perfetg ha propi gì a disposiziun avunda tualettas per dunnas e mattas.

Tut auter è quai stà al campinadi europeic da ballape da las dunnas il fanadur. Ventg lungas minutas sun jau stada en colonna davant la tualetta dal «Joggeli» a Basilea ed hai uschia manchentà diesch minutas da la segunda mesadad dal giu dal Danemarc cunter la Germania. Para ch'ins aveva emblidà da metter a disposiziun avunda tualettas per las dunnas e las mattas. U ch'ins n'aveva betg quintà, che dapli dunnas e mattas che mats ed umens gajan a guardar ils gieus d'in campinadi europeic da ballape da dunnas. En Svizra n'han ins simplamain gì naginas pussaivladads per cumparegliar.

Gist quai è er stà il cas il november/december 1971. Bain avevan ils umens svizzers concedì ils dretgs politics a lur conburgaisas. Ma ins n'aveva betg quintà, che dunnas vegnian er propi

elegidas en ils parlaments. En mintga cas n'han las 13 emprimas cusseglieras naziunalas e l'emprima cussegliera dals chantuns chattà sin ils plauns respectivs nagins «cabinettis» che fissan stads endrizzads per ellas. Na, ellas han stuì duvrar la tualetta da visitadras da la Chasa federala al plaunterren – ubain ina da las duas autras tualettas da dunnas lunsch davent da las salas dal parlament.

L'equipament d'edifizis, la concepziun dal spazi public, tge che stat a disposiziun per tge intents e co ch'i vegn finanzià – tut quai è infrastruttura: Questa infrastruttura tradescha bler davart las structuradas socialas. Ella è per uschè dir il maletg da las structuradas socialas. E sco quai che nus avain vesì questa stad 2025 cun il ballape, datti tschertas differenzas.

Forsa che Vus As regurdais anc: Per l'avertura da la sessiun d'october 2024 sun jau ma fatschentada cun il princip da la gulivaziun da las grevezzas sco instrument impurtant da noss stadi federalistic. I gieva per la gulivaziun da dischavantatgs ch'i dat senza atgna culpa, oravant tut dischavantatgs che sa basan sin malgistadads. Pir cura ch'ils dischavantatgs èn gulivads, pon tuttas e tuts partir dal medem punct anora. Quai numnan ins egualitad da las schanzas.

Il pli emprim vai per fairness tar las schanzas, pir en segunda lingia per resultats.

Ma quai pretenda chapientscha. I dovra voluntad e persvasiun. Cura ch'ils umens svizzers han reconuschì l'onn 1971 lur conburgaisas sco umans maiorens equivalentes e concedì ad ellas ils medems dretgs politics, è quai stà mo l'emprim pass. A partir da lura han las dunnas bain gì ils medems dretgs politics, dentant anc ditg betg las medemas schanzas.

Sch'ins avess vulì dar a las dunnas las medemas schanzas, avessi dà duas pussaivladads: U ch'ins avess stuì dublegiar ils sezs en ils parlaments, u che la mesadad dals parlamentariss n'avess betg pli dastgà candidar per las emprimas elecziuns suenter l'introducziun dal dretg da votar e d'eleger da las dunnas. Empè da quai observain nus ussa dapi 54 onns cun blera pazienza, co che la represchentanza da las dunnas crescha u sa reducescha d'ina elecziun a l'autra per in pèr paucs puncts procentuals, co che candidatas cumbattan per ina buna posiziun sin ina glista e co ch'ellas conquistan plaun a plaun sezs en il parlament u en in'executiva. Da represchentanzas dal pievel pariteticas na pon ins – cun in pèr paucas excepziuns chantunalas – betg discurre tar nus en Svizra.

Atgnamain As vuleva jau explitgar, pertge che la vicepresidenta dal Cussegl grond ed jau avain envidà durant noss onn d'uffizi tut las uniuns da dunnas dal chantun Grischun en il Cussegl grond. Sco che Vus avais pudì constatar sez, han tschients da dunnas da tut il chantun dà suatientscha a nossa invitaziun ed ans han undrà cun lur preschientscha durant las sessiuns – er durant la sessiun actuala. Ellas tuttas han demussà lur viv interess per nossa lavur, per la politica. Per quai vuless jau engraziar cordialmain a tut questas dunnas. Ellas han vulì vesair cun agens egls, co che quai è, sche duas dunnas presidieschan e mainan il Cussegl grond. «You believe what you see»: Ins sto vesair insatge cun agens egls, per ch'ins craja quai.

Ussa essas Vus dumandadas e dumandads, stimadas collegas e stimads collegas, preziadas presidentas e preziads presidents da las partidas:

Sche Vus pensais a las elecziuns 2026, faschai per plaschair er ponderaziuns davart l'egualitad da las schanzas. Igl è mes giavisch, che Vus fetschias tut il pussaivel per chattar e motivar candidatas d'entrar en la politica. Plinavant èsi er mes giavisch, che Vus porschias a Vossas candidatas il meglier preventiv pussaivel per il cumbat electoral e las meglras posiziuns sin las glistas.

Il potenzial ed ina gronda selecziun avais Vus pudì vesair cun agens egls sin la tribuna durant tut las sessiuns dapi l'avust 2024 e fin il di dad oz.

Jau As engraziel per Vossa atenziun ed As giavisch tut il bun!

Qua tras decler jau la sessiun d'avust 2025 per averta.